

आकाशवाणी

1. प्रधानमंत्री नरेंद्र मोदी होरें आखेआ जे कल्लै थमां देसै च नराते शुरू होआ'रदे न ते इस शुभ मौके पर कल्लै थमां गै अगली पीढ़ी दे जीएसटी सुधारें गी बी लागू कीता जा'रदा ऐ।
2. जीएसटी दि'आं नमियां दरां अज्ज अदी रातीं थमां अमल च आई जाडन। आम इस्तेमाल आहली केई सारी चीजें पर टैक्स घटने कन्ने आम माहनुयै गी बड़ी राहत हासल होग।
3. रक्षा मंत्री राजनाथ सिंह अज्जै थमां मोरक्को दी आधिकारिक यात्रा पर जा'रदे न। एह भारत दे कुसै बी रक्षा मंत्री हुं'दी मोरक्को दी पैहली-पैहली यात्रा ऐ।
4. अफ़ग़ानिस्तान च बगराम एयरबेस गी वापस अपने नियंत्रण हेठ लैने दी अमरीका दी मंग पर त्रिक्खी प्रतिक्रिया दि'दे होई अफ़ग़ानिस्तान ने आखेआ ऐ जे ऐसी कुसै बी कोशश दा सख्ती कन्नै बरोध कीता जाहग।
5. देशे दे बक्ख-बक्ख हिस्सें च अज्ज महालया दा त्योहार मनाया जा'रदा ऐ। महालया पितृ पक्ष श्राद्ध दे समापन ते दुर्गा पूजा उत्सव दी शुरुआत दा प्रतीक ऐ।
6. दुबई च एशिया कप टी-20 क्रिकेट प्रतियोगिता च अज्ज रातीं 8 बजे सुपर-4 दे महत्वपूर्ण मुकाबले च भारत दा सामना पाकिस्तान कन्नै होग।

<><><><><><>

PM-Address

प्रधानमंत्री नरेंद्र मोदी होरें अज्ज संज्ञा राष्ट्र गी संबोधित कीता। अपने भाषण च प्रधानमंत्री होरें आखेआ जे कल्लै थमां मुख्य भरे च नरातें दा त्योहार शुरू होआ'रदा ऐ ते इस शुभ मौके पर “आत्मनिर्भर भारत” अभियान बी शुरू कीता जाहग, जेह्दे तैह्त्त कल्लै थमां अगली पीढ़ी दे जीएसटी सुधारें गी बी लागू कीता जाग। प्रधानमंत्री होरें जीएसटी सुधारें गी लागू करने गी बचत उत्सव करार दित्ता। उ'नें आखेआ जे बचत उत्सव कन्नै गरीबें, आम लोकें, मध्यम वर्गीय लोकें, नौजोआनें, करसानें, बपारियें ते दकानदारें सने समाज दे हर माहनु गी लाह हासल होग। उ'नें गलाया जे “इक्क मुख्य इक टैक्स” दा नजरिया हकीकत च तब्दील होई गेआ ऐ ते सुधारें आहली एह प्रक्रिया लगातार जारी रौहग। लोक घट्ट कीमतें पर अपने पसंद दे समेयान खरीद सकडगन। उ'नें आखेआ जे राष्ट्र दी विकास गाथा एकडे सुधारें कन्नै बदल जाहग ते इ'दा सबनें शा मता लाह नौजवानें, मझाटले तबके दे लोकें,

करसानें, महिलाएं ते उद्यमियें गी हासल होग। श्री मोदी होरें आखेआ जे हर इक राज्य, साढ़े म्हान राश्ट्र दे विकास दी जात्तरा च इक बरोबर दा सांझेदार होग। प्रधानमंत्री होरें अगली पीढी दे जीएसटी सुधारें, बचत उत्सव ते नरातें लेई देशवासियें गी शुभकामनां दित्तिआं। प्रधानमंत्री होरें आखेआ जे उं'दी सरकार ने टैक्स प्रणाली गी सौक्खा बनाया ऐ। उ'नें दस्सेआ जे 2014 च सत्ता च औने दे बाद राज्यें ते हितधारकें कन्नै सलाह-सुत्तर दे बाद उं'दी सरकारै जीएसटी गी तरजीहू दित्ती। उ'नें आखेआ जे जरूरी चीजां, दवाईयां ते सेहत बीमा 5 फीसद टैक्स दे दायरे च होडन। प्रधानमंत्री होरें खुशी व्यक्त करदे होई आखेआ जे पिच्छले 12एं बरें च 25 करोड़ लोक गरीबी शा उबरे न। उ'नें आखेआ जे उं'दे टैक्स दे बोझ गी घट्ट करने लेई सरकारै एहू गैहीं पुट्टियां न। मझाटले तबके दे लोकें गी हून इस गैहू कन्नै दोहरा फायदा होग। हून उ'नेंगी समेयान ते गड्डिएं लेई घट्ट खर्च करना पौग। श्री मोदी होरें आखेआ जे होटल च ठैहने दी कीमत च कमी औने कन्नै सैलसफा बी घट्ट खर्चीला होग। प्रधानमंत्री होरें आखेआ जे उं'दी सरकार 'नागरिक देवो भवः' दे मन्तर कन्नै अगड़ी बधा करदी ऐ। श्री मोदी होरें आखेआ जे भारत च माल तैयार करने दे खेत्तर लेई बी बड़े शैल प्रबन्ध कीते गे न। उ'नें भलेआं लौहके, लौहके ते दरम्याने दर्जे दे उद्यमों गी गुजारिश कीती जे ओहू देशै गी गौरव दोआने आहले मय्यारी उत्पादें दा निर्माण करना।

<><><><><><>

GST-Reforms

अगली पीढी दे जीएसटी सुधार कल्लै थमां लागू होआ'रदे न। प्रधानमंत्री नरेंद्र मोदी होरें सुतेंवता दिवस दे मौके उप्पर लाल किले दी प्राचीर थमां अगली पीढी दे जीएसटी सुधारें दी घोषणा कीती ही। उं'दे इस नजरिये ने इस म्हीने दी त्रै तरीक गी उसलै मूर्त रूप लैता जिसलै जीएसटी परिषद ने नागरिकें दे जीवन गी सौक्खा बनाने आस्तै केई खेत्तरें च टैक्स दिएं दरें च कटौती दा ऐलान कीता। परिषद नै द'उं सतहें आहले टैक्स सरिस्ते दी गल्ल कीती। एहदे अलावा किश तालमी चीजें पर 40 फीसद टैक्स लाने दा ऐलान बी कीता जिं'दे च तम्बाकू ते लगजरी चीजां शामिल न। ध्यानजोग ऐ जे कल्लै थमां पूरे देसै च जीएसटी दिआं छड्डियां त्रै गै स्लैबां 5 फीसद, 18 फीसद ते 40 फीसद दी टैक्स स्लैब गै लागू होग। इंदे चा छड़ी द'उं स्लैबें - 5 फीसद ते 18 फीसद दी स्लैब दा गै आम माहनुयै कन्नै मता लैन-देन होग।

<><><><><><>

PM-Arunachal Visit

प्रधानमंत्री नरेंद्र मोदी हुं'दी त्रिपुरा यात्रा दिएं तैयारियें गी मुक्कदा रूप देई दित्ता गेआ ऐ। श्री मोदी कल प्रसाद योजना दे तैहत माता त्रिपुर सुंदरी मंदर परिसर च नमीं-विकसित कीती गेदी बुनियादी सुविधाएं ते एहदा छलैपा बधाने सरबंधी कम्में दा उद्घाटन करडन। सरबंधत पुलस अधिकारी मूजब मंदिर परिसर ते ओहदे आले दोआले दे इलाकें दे कन्नो-कन्नो गोमती जिले च स्थित उदयपुर शैहर च बी सुरक्षा दे सख्त बंदोबस्त कीते गे न। ओ.टी.पी.सी पलाटाना थमां मंदरै धोहडी 12 किलोमीटर दा रोड शो बी आयोजित करने दी योजना ऐ, जेहदे च सुरक्षा दे पुख्ता इंतजाम कीते गे न। सुरक्षा जकीनी बनाने लेई त्रिपुरा पुलस दे कन्नो-कन्नो सीआरपीएफ ते बीएसएफ दे जवानें गी बी तैनात कीता गेआ ऐ। एहदे परैन्त, प्रधानमंत्री मोदी 51 शक्तिपीठें चा इक, माता त्रिपुर सुंदरी स्थान पर पूजा-अर्चना करडन। उं'दा कल दपैह्नी अरुणाचल प्रदेश थमां अगरतला पुज्जने दा कार्यक्रम ऐ ते उत्थुआं ओह उद्घाटन कार्यक्रम लेई सिद्धे राज्य दी राजधानी थमां तकरीबन 65 किलोमीटर दक्खन च स्थित उदयपुर जाडन।

<><><><><><>

Rajnath Singh Morocco

रक्षा मंत्री राजनाथ सिंह होर अज्जै थमां मोरक्को दी आधिकारिक यात्रा पर जा'रदे न। एहू भारत दे कुसै बी रक्षा मंत्री हुं'दी मोरक्को दी पैहली-पैहली यात्रा होग, जेहडी दौनें मुल्लें बश्कार बधदे रणनीतिक सैहयोग गी दर्शादी ऐ। इस दरान राजनाथ सिंह होर रक्षा, रणनीतिक ते उद्योग सैहयोग गी मजबूत करने आस्तै मोरक्को दे रक्षा मंत्री अब्देलतीफ लौदियी हुं'दे कन्नै दपक्खी बैठक लाडन। ओहू बेरेचिज च टाटा एडवांस्ड सिस्टम्स मोरक्को दे व्हील्ड आर्मर्ड प्लैटफार्म दे नमें विनिर्माण संयंत्र दे उद्घाटन च बी शामिल होडन। एहू अफ्रीका च भारत दा पैहला-पैहला रक्षा विनिर्माण संयंत्र होगा।

<><><><><><>

Trump-Bargam Air Base

अमरीका ने अफ़ग़ानिस्तान गी बगराम एयरबेस वापस करने दी मंग कीती ऐ। अमरीकी राष्ट्रपति डोनल्ड ट्रम्प होरें अफगानिस्तासन गी धमकी दिं'दे होई आखेआ ऐ कि जेगर उन्ने ऐसा नेई कीता तां एहदे नतीजे खरे नेई होडन। उत्थे गै दुई बक्खी, अफगानिस्तान दे अधिकारियें बगराम एयरबेस पर कब्ज़ा करने दी अमरीका दिएं धमकियें गी खारज करदे होई आखेआ ऐ जे एयरबेस पर अमरीका दे परतियै नियंत्रण स्थापित करने दी कुसै बी कोशश दा सख्ती कन्नै बरोध कीता जाह्ग। अफगानिस्तानन दे खुफिया विभाग दे अधिकारी मुल्ला ताजमीर जवाद ने आखेआ जे सरकार मजूदा

स्थिति गी बनाई रक्खग। अफगानिस्तारन दे रक्षा मंत्री मोहम्मद याकूब मुजाहिद ने आखेआ कि जेगर अमरीका अफगानिस्तान थमां जाना नेई चांहदा ते अफगानिस्तान च होर मते ब्हाई अहुं पर नियंत्रण करना चांहदा ऐ तां अफगानिस्तान अगले द'उं दहाके तगर लड़ने लेई तैयार ऐ।

<><><><><><>

Roads Sanctioned

केन्द्री ग्रामीण विकास मंत्रालय नै 2025-26 आहले माली ब'रे लेई प्रधानमंत्री ग्राम सड़क योजना दे चौथे गेड़ दे पैहले बैच तैहत उधमपुर-कठुआ-डोडा लोकसभा हल्के च 110 नमीं शिड़क परियोजनाएं गी मंजूरी दिती ऐ। तकरीबन 2 ज्हार करोड़ रुपें दी लागत आहली इ'नें परियोजनाएं कन्नै खित्ते दे 178 इलाकें च हर मौसम च शिड़क राबता यकीनी बनी सकग। केंद्री राई-बाई ते ग्रामीण विकास मंत्री शिवराज सिंह चौहान होरें इस बारे प्रधानमंत्री हुं'दे दफ्तरै च राज्यमंत्री डाक्टर जितेंद्र सिंह होरें'गी जानकारी दिती। डॉ. सिंह होरें केंद्र सरकार दा धन्नवाद करदे होई आखेआ जे एकड़ी परियोजनाएं कन्नै ग्रामीण लोकें आस्तै जात्तरा च सखाल होग ते शिड़क राबता बी बेहतर बनग

<><><><><><>

Navratra-Festival

कल्लै थमां शुरू होआ'रदे नरातें दे त्यौहार गी दिखदे होई श्री माता वैष्णो देवी श्राइन बोर्ड ते पवित्तर शैहर कटड़ा ज्हारां बदे श्रद्धालुएं दे सोआगत लेई पूरी चाल्ली तैयार न। श्राइन बोर्ड आसेआ श्रद्धालुएं गी आध्यात्मिक तीर्थ यात्रा दा अनुभव करोआने लेई सब्बे लोड़चदे बंदोबस्त करी लैते गेदे न। 9 दिनें दे इस उत्सव दी तैयारी लेई भवन, अर्धकुंवारी, भैरो मंदर ते पवित्तर गुफा बक्खी जाने आहले पूरे रस्ते गी फुल्लें, रंगी-बरंगी लाइटें ते रिवायती डिजाइनें कन्नै सजाया गेदा ऐ। अंदर आहले गर्भगृह गी खास करियै तां जे मौसमी फुल्लें ते थीम आहली सजावट कन्नै सनाखड़ा बनाया गेदा ऐ।

<><><><><><>

CM-Sports

मुख्यमंत्री उमर अब्दुल्ला होरें आखेआ ऐ जे उंदी सरकार खेड्डें ते एहदे विकास लेई सरबंधी ढांचे पर विशेष ध्यान देआ'रदी ऐ ते शायद गै ऐसा कोई हल्का ऐ जित्थे खेड्डु सरबंधी विकास नेई कीता जा'रदा ऐ। उनें आखेआ जे सरकार बक्ख-बक्ख इलाकें च उनें खेड्डें दी पंछान करा'रदी ऐ जेड़ी नौजोआनें च मती पसंदीदा न जिआं क्रिकेट, फुटबॉल, जिमनास्टिक ते वॉलीबॉल ते एहू कोश्ट कीती जा'रदी ऐ जे सरकार आसेआ नौजोआनें गी इनें खेड्डें लेई जरूरी स्थूलतां मुहैया कराई जान। मुख्यमंत्री

उमर अब्दुल्ला होरें गलाया जे कश्मीर मैराथान दा दुआ संस्करण 2 नवम्बर गी शुरू होआ'रदा ऐ।
उनें मुख्य भरै थमां खडारियें गी सद्दा दित्ता जे ओहू मैराथान च हिस्सा लैने लेई श्रीनगर औन।

<><><><><><>

White House

अमरीका नै नमीं एच-13 वीजा नीति बारै इक महत्वपूर्ण स्पष्टिकरण जारी कीता ऐ। इस नीति गी लेइयै प्रौद्योगिकी उद्योग च यक्को-तक्की, डर ते चिंता दी स्थिति बनी गई ऐ। स्पष्टीकरण च आखेआ गेआ ऐ जे नमी नीति च इक लक्ख डालरें दा शुल्क छड़ा नमें आवेदकें पर लाया जाग ते एहू इकमुश्त भुगतान होगा। व्हाइट हाउस दी प्रेस सचिव कैरोलिन लेविट होरें नमी नीति दे लागू होने दे किश घंटे पैहले आखेआ जे जिनें लोकें कश पैहले सोयां एच-1 बी वीजा ऐ ते मौजूदा समें च मुख्य थमां बाहर न, उन्दे थमां परतिए वापस औने आसतै इक लक्ख डालर दा शुल्क नेई लैता जाग।

<><><><><><>

H-1B Visa

भारत नै आखेआ ऐ जे ओहू एच-1 बी वीजा आवेदनें पर इक लक्ख डालर दा शुल्क लाने दे अमरीका दे फैसले दे असर दी जांच करा'रदा ऐ, पर इस गैँड दा आम लोकें पर असर पेई सकदा ऐ। विदेश मंत्रालय नै आखेआ ऐ जे भारती उद्योग सने सारे सरबन्धत पक्ख अमरीका दे एच-1बी वीजा कार्यक्रम पर प्रस्तावित पाबंदिएं दे पूरे असर दा अध्ययन करा रदे न। विदेश मंत्रालय दे प्रवक्ता रणधीर जयसवाल होरें इक बयानै च आखेआ जे भारत ते अमरीका दे उद्योगें गी नमिएं काहड़ें ते रचनात्मकता च दिलचस्पी ऐ ते इस भेठा विचार-विमर्श होने दी ते करने दी मेद कीती जाई सकदी ऐ।

<><><><><><>

Mahalaya-Festival

देशै दे बक्ख-बक्ख हिस्सें च अज्ज महालया दा त्योहार मनाया जा'रदा ऐ। महालया पितृ पक्ष श्राद्ध दे समापन ते दुर्गा पूजा उत्सव दी शुरुआत दा प्रतीक ऐ। मान्यता ऐ जे महालय दे अज्जै दे गै दिन देवी दुर्गा दा धरतै पर औना होंदा ऐ। मान्यता इब्बी ऐ जे अज्जै दे गै दिन देवी दुर्गा ने राक्षस महिषासुर दा वध कीता हा। इस दिन, बंगाली समुदाय दे लोक पारंपरिक रूप कन्नै बडुलै महिषासुर मर्दिनी स्तोत्र दा पाठ करदे न। इस स्तोत्र च जेहडे 21 छंद न इंदे च मा भगवती दी महिमा, उंदे स्वरूपें ते महिषासुर राक्षस दे संहार दा बर्णन ऐ। पवित्र स्तोत्र दे पाठ मगरा श्रद्धालु अपने पित्तरें गी रूट्टी-पानी ते होर चीजां अर्पित करदे होई तर्पण करदे न। प्रधानमंत्री नरेन्द्र मोदी ते गृह मंत्री अमित शाह होरें शुभ महालया दे मौके उप्पर लोकें गी अपनियां शुभकामनां दित्तिआं न। प्रधानमंत्री होरें कामना कीती

ऐ जे इस मौके उप्पर मां दुर्गा दा दिव्य शीर्वाद सबनें लेई शक्ति, नंद ते खरी सेहत लेइयै आवै। श्री अमित शाह होरें अपने शुभकामना संदेस च आखेआ ऐ जे देवी दुर्गा हुं'दा शीर्वाद हर घरै च खुशी, शक्ति, समृद्धि ते खरे सेहत दी आमद आहला साबत होऐ।

<><><><><><>

LG-Sewa Parv

मुख भरै च चलै करदे 'सेवा पर्व' दे इक हिस्से दे तौरा पर उपराज्यपाल मनोज सिन्हा होरें अज्ज श्रीनगर दी डल झील च शुरू कीते गेदे सफाई अभियान च शिरकत कीती। इस मौके एलजी होरें आखेआ जे पिछले 5एं बरें दरान कीते गेदे अनथक जत्तें दी बदोलत डल झील दे त्रीए हिस्से कोला मते इलाकें गी साफ करियै एहदे च नमे सिरेआ जान भरी गेई ऐ। झील दे इक बड़े हिस्से चा जड़ी ते होर दुए किस्में दियां बेलां बूहूअे हटाइयै इसी साफ कीता गेआ ऐ ते पैहली बारी एल्लै एहदा कोइ, 20 मुरब्बा किलोमीटर कोला मता हिस्सा खुल्ले ते साफ पानी आहला ऐ। मनोज सिन्हा होरें आम लोकें अगो अपील कीती जे ओहू डल झील दे अलावा होरनें दरयाएं-नदिएं सरें बगैरा दे संरक्षण दे कम्में च इक जिम्मेदार शैहरी दे रूपै च अपनी जिम्मेदारी निभान तां जे स्हाड़े एहू जल स्रोत ना छड़ा साफ-सुथरे बने दे रौह्ण, सगुआं इनेंगी दिक्खने औने आहले मते-मते लोक इत्त बक्खी आकर्षित होन।

<><><><><><>

Prog.Announcement

आकाशवाणी जम्मू दा क्षेत्रीय समाचार एकांश मुख भरै च मनाए जा'रदे सेवा पर्व-2025 दे सरबंध्यै च कुल 8 कार्यक्रमें दी बशेश श्रृंखला प्रसारत करा'रदा ऐ जेहदे तैहत संगारें 22 सितंबर गी 25एं मिनटें दा इक कार्यक्रम पेश कीता जाहग ऐ जेहदा विशे ऐ "पर्पल रेवोल्यूशन दे राहें ग्रामीण अर्थ बवस्था दा सशक्तिकरण"। एहू बशेश प्रसारण कल 22 सितम्बर गी दपैहरी 12 बजे कीता जाग। एहदे च स्हाड़े खास परौह्णे होडन सी.एस.आई.आर.-ट्रिपल आई.एम जम्मू दे डरेक्टर डॉ. जबीर अहमद जेड़े इस विशे दे बक्ख-बक्ख पैहलुएं पर अपने माहिराना बचार सांझे करडन। इस कार्यक्रम दा संचालन करडन स्हाड़ी न्यूज एंकर अभिलाषा शर्मा ते श्रुति खजूरिया। इस परिचर्चा गी तुस मिडियम वेव 303 मीटर यानि 990 किलोहर्टज पर ते एफ.एम 100.3 मेगाहर्टज पर सुनी सकदे ओ।

<><><><><><>

Asia Cup Cricket

दुबई च एशिया कप टी-20 क्रिकेट प्रतियोगिता च अज्ज सुपर-4 दे इक महत्वपूर्ण मुकाबले च भारत दा सामना पाकिस्तान कन्नै होग। एहू मैच हूनै शा किश चिरै मगरा ठीक रातीं 8 बजे थमां खेडूआ

जाहग। प्रतियोगिता च दौनें टीमें बश्कार एह दुआ मुकाबला ऐ। भारत ने पिच्छले हफ्ते होए दे मुकाबले च पाकिस्तान पर 7एं विकेटें कन्नै शानदार जित्त हासल कीती ही। एशिया कप दे इतिहास च भारत अजें तगर दी सबनें शा कामयाब टीम रेई दी ऐ जिन्ने 8 बारी एह खिताब अपने नांऽ कीते दा ऐ। भारत दे बाद दुए नम्बरै पर श्रीलंका दी टीम ऐ जिन्ने 6 बारी जिसलै के पाकिस्तान ने छड़ा 2 बारी गै एह प्रतियोगिता जित्ती दी ऐ।

<><><><><><>